



秦隱君集

五言律詩

秋晚拾遺朱放訪山居

不逐時人後終年獨閉關
家中貧自樂石上臥常
閒
糝粟添新味殘花帶老顏
侍臣當獻納那得到
空山

題女道士居

不餌住雲溪休丹罷藥畦
杏花虛結子石髓老成
泥掃地青牛臥栽松白鶴棲
共知仙女麗莫是阮
郎妻

山中枉張宙員外書期訪衡門

常恨相知晚朝來枉數行臥雲驚聖代拂石候仙
郎時果連枝熟春醪滿甕香貧家仍有趣山色滿
湖光

常山贈張正則評事

終年避喧思常事五千言流水間過院春風與閉
門山葵邀上客桂實落華軒莫強教余起微官不
足論

題鏡湖野老所居

湖裏尋君去樵風往返吹樹暄巢鳥出路細田

移漚葦成魚網枯根是酒卮老年唯自適生事任
群兒

早秋題崔業居處

從來席不暖爲爾便淹留雞黍今相會雲山昔共
遊上簾宜曉景臥簟覺新秋身事何須問余心正
四愁

烏程楊華明府

策杖政成時清溪弄釣絲當年潘子貌避病沈侯
詩漉酒迎賓急看花署字遲梅楊今熟未與我兩
三枝

徐侍郎素未相識携酒命饌兼命詩客同
訪會稽山居

忽道仙翁至幽人學拜迎華簪窺甕牖珍味代藜
羹洗硯魚仍戲移尊鳥驚蘭亭攀叙却會此越
中營

春日間居三首

一似桃源隱時令過客迷礙冠門柳長驚夢院鶯
啼澆藥泉流細圍碁日影低舉家無外事共愛草
萋萋

長謔朝復暝幽獨幾人知老鶴兼雛弄叢篁帶笋

移白雲將袖拂青鏡出簷窺邀取漁家叟花間把
酒卮

寂寂池亭裏軒窓間綠苔遊魚牽荇沒戲鳥數花
催小逕僧尋去高峰鹿下來中年曾屢辟病復
遲違

題石室山王君所居

白雲知所好栢葉幸加餐石鏡妻將照仙書我借
看鳥來翻藥枕猿飲怕魚竿借問巖前樹柯枝曾
掛冠

秋日過僧惟則故院

衰草經行處微燈舊道場
門人失譚柄野鳥上禪
牀科斗書空古梅檀鉢自香
今朝數行淚却灑約
公房

送王道士

整鳥雙鶴屢飛翔恐入壺中住須傳
後方霓裳雲氣潤石徑木苗香
一去何時見仙家日月長

將移耶溪舊居留贈嚴維祕書

雞犬漁舟裏長謔任興行
那邀落日醉已被遠山
迎書屨將非重荷衣著甚輕
謝生無箇事忽起爲

蒼生

山中崔大夫有書相問

客在煙霞裏間間逐狎鷗
終年常裸足連日半蓬
頭帶月乘魚艇迎寒從鹿裘
已於人事少多被掛
冠留素業堆千卷清風至一丘
蒼黃倒藜杖偃僂
覩銀鈎跡愧巢由隱才非管樂儔
從來自多病不
是傲王侯

七言律詩

耶溪書懷寄劉員外

時人多笑樂幽棲
晚起間行獨杖藜
雲色卷舒前

後嶺藥苗新舊兩三畦偶逢野果將呼子屢折荆
釵亦爲妻擬共釣竿長往後嚴陵灘上勝耶溪

山中枉皇甫溫大夫見招書

十年木屐步苔痕石上松間水自喧三辟草堂仍
被褐數行書札忽臨門臥多共息嵇康病才劣虛
同郭隗尊亞相已能憐潦倒山花笑處莫啼猿

山中奉寄錢起員外兼簡苗發員外

空山歲計是胡麻窮海無梁泛一槎稚子唯能覓
梨栗逸妻相共老煙霞闌吟麗句驚巢鶴閒閉春
風看落花借問省中何水部今人幾箇屬詩家

題茅山李尊師山居

天師百歲少如童不到山中竟不逢洗藥每臨新
瀑水步虛時上最高峰籬間五月留殘雪座右千
年隱老松此去人寰今遠近回看雲壑一重重

獻薛僕射

并序

系家于剡山向盈一紀大曆五年人以文聞鄴守
薛公無何奏系右衛率府倉曹參軍章所不欲以
疾辭免因將命者輒獻斯文

由來那敢議輕微散髮行歌自采薇逋客未能忘
野興辟書翻遣脫荷衣家中匹婦空相笑池上群

鷗盡欲飛更乞大賢容小隱益看愚谷有光輝

鮑方員外見尋因書情呈贈

少小為儒不自強如今懶復見侯王覽鏡已知身
漸老買山應作計偏長荒涼鳥獸同三徑繚亂琴
書共一牀猶有郎官來問疾時人莫道我佯狂

寄浙東皇甫中丞

間間麋鹿或相隨一兩年來鬢始衰琴硯共依春
酒甕雲霞覆着破柴籬注書不向時流說種藥空
令道者知又帶紗巾仍舊草山中那得見朝儀

五言絕句

會稽山居寄薛播侍郎袁高給事高參舍

人

稷契今為相明君復是堯寧知買臣困猶負會稽
樵

張建封大夫奏系為校書郎因寄此作

以是煙霞客潭深釣得魚不知芸閣上遺校幾行
書

七言絕句

間居覽史

長策胷中不復論荷衣藍縷閉柴門當時漢祖無

三傑爭得咸陽與子孫

秋日送僧志幽歸山寺

禪室繩牀在翠微松間荷笠一僧歸磬聲寂歷宜
秋夜手冷燈前自衲衣

題僧明惠房

簷前朝暮雨添花八十真僧飯一麻入定幾時還
出定不知巢燕汗袈裟

山中贈拾遺耿漳兼寄兩省故人

數片荷衣不蔽身青山白鳥豈知貧如今非是秦
時也更隱桃花亦笑人

荅泉州薛播使君重陽日贈酒

欲強登高無力也籬邊黃菊爲誰開共知不是潯
陽郡那得王弘送酒來

送洪道士歸山院

霞外主人門不扃數枝桃樹藥囊青閒行池畔隨
孤鶴若問多應道姓丁

題贈張道士山居

盤石垂蘿即是家園頭猶看五枝花松間寂寂無
煙火應報朝來一片霞

山中書懷寄張建封大夫

昨日年催白髮新身如麋鹿不知貧時時亦被群
兒笑賴有南山四老人

期王鍊師不至

黃精蒸罷洗瓊杯林下從留石上苔昨日圍碁未
終局多乘白鶴下山來

奉寄晝公

簑笠雙童傍酒船湖山相引到房前芭蕉何事教
人見暫借空牀守坐禪

宿雲門上方

禪室遙看峰頂頭白雲東去水長流松間倘許幽

人住不更將錢買沃洲

即事奉呈郎中韋使君

久臥雲間已息機青袍忽著狎鷗飛詩興到來無
一事郡中今有謝玄暉

附蘇州刺史韋應物荅秦十四校書

知掩山扉三十秋魚鬚翠碧葉牀頭莫道謝公方
在郡五言今日爲君休

山中贈諸暨丹丘明府

荷衣半破帶莓苔笑向陶潛酒甕開縱醉還須上
山去白雲那肯下山來

秦隱君集卷終

郎士元集卷上

五言古詩

題劉相三湘圖

昔日醉衡霍邇來憶南州今朝平津邸兼得瀟湘
遊稍辨郢門樹依然芳杜洲微明三巴峽咫尺萬
里流飛鳥不知倦遠帆生暮愁涪陽指天末此緒
空悠悠枕上見漁父坐中當狎鷗誰言魏闕下自
有東山幽

關羽祠送高員外還荊州

將軍稟天姿義勇冠今昔走馬百戰場一劔萬人

敵雖爲感恩者竟是思歸客流落荆巫間徘徊故鄉
隔離筵對祠宇灑酒暮天碧去去勿復言衙悲
向陳跡

送陸員外赴潮州

含香臺上客剖竹海邊州楚地多歸信閩溪是亂
流今朝永嘉興重見謝公遊

酬二十八秀才見寄

昨夜山月好故人果相思清光到枕上嫋嫋涼風
時永意能在我憶無攜手期

宿杜判官江樓

適楚豈吾願思歸秋向深故人江樓月永夜千里
心葉落覺鄉夢鳥啼驚越吟寥寥更何有續斷空
城砧

湘夫人

蛾眉對湘水遙哭蒼梧山萬乘旣已歿孤舟誰忍
還至今楚竹上猶有淚痕班南有涪陽路渺渺多
新愁桂酒神降時迴風江上秋彩雲復無處碧水
空安流

七言古詩

塞下曲

寶刀塞下兒身經百戰曾百勝壯心竟未嫖姚知
白草山頭日初沒黃沙戍下悲歌發蕭條夜靜邊
風吹獨倚營門望秋月

郢城西樓吟

連山盡處水縈迴山上戍門臨水開朱欄直下一
百丈日暖遊鱗自相向昔人愛險閉層城今日愛
閒江復清沙洲楓岸無來客草綠花紅山鳥鳴

五言律詩

長安逢故人

數年音信斷不意在長安馬上相逢又人中欲認

難一官今懶道雙鬢竟羞看莫問生涯事只應持
釣竿

送韋湛判官

高閣晴江上重陽古戍間聊因送歸客更此望鄉
山惜別心能醉經秋鬢自斑臨流興不盡惆悵水
雲間

送長沙韋明府

秋入長沙縣蕭條旅宦心煙波連桂水官舍映楓
林雲日楚天暮沙汀白露深遙知訟堂裏佳政在
鳴琴

送孫願

悠然富春客憶與暮潮歸擢第人多羨如君獨步
稀亂流江渡淺遠色海山微若訪新安路嚴陵有
釣磯

送林宗配雷州

昨日三峰尉今朝萬里人平生任孤直豈是不防
身海霧多爲瘴山雷乍作隣遙憐北戶月與子獨
相親

送洪州李別駕之任

南去秋江遠孤舟興自多能將流水引更入洞庭

波夏口帆初上潯陽鴈正過知音在霄漢佐郡豈
蹉跎

送楊中丞和番

錦車登隴日邊草正萋萋舊好尋君長新愁聽鼓
輦河源飛鳥外雪嶺大荒西漢壘今猶在遙知路
不迷

送李將軍赴定州

雙旌漢飛將萬里授橫戈春色臨邊盡黃雲出塞
多鼓輦悲絕漠烽戍隔長河莫斷陰山路天驕已
請和

送李騎曹之靈武寧侍

一歲一歸寧涼天數騎行河來當塞曲山遠與沙
平縱獵旗風卷聽笳帳月生新鴻引寒色迴日滿
京城

送張南史

雨餘深巷靜獨酌送殘春車馬雖嫌僻鶯花不棄
貧蟲聲粘戶網鼠跡印牀塵借問山陽會如今有
幾人

送奚賈歸吳

東南富春渚曾是謝公遊今日奚生去新安江正

秋水清迎過客霜葉伴行舟遙想赤亭下聞猿應
夜愁

送裴補闕入河南幕

皎然青瑣客何事動行軒苦節酬知己清吟去掖
垣秋城臨海樹寒月上營門鄒魯詩書國應無鼙
鼓喧

送韓司直路出延陵

遊吳還適越來往任風波復送王孫去其如春草
何岸明殘雪在潮滿夕陽多季子留遺廟停舟試
一過

鹽屋縣鄭礪宅送錢大

暮蟬不可聽落葉豈堪聞共是悲秋客那知別故
群荒城背流水遠鴈入寒雲陶令門前菊餘花可
贈君

送元詵還丹陽別業

已知成傲吏復見解朝衣應向丹陽郭秋山獨掩
扉草堂連古寺江日動晴暉一別滄洲遠蘭橈幾
歲歸

朱方南郭留別皇甫冉

縈迴楓葉岸留滯木蘭橈吳岫新經雨江天正落

潮故人勞見愛行客自無家若問前程事孤雲入
剡遙

贈張伍諝歸濠州別業

常知罷官意果與世人疎復此涼風起仍聞濠上
居故山期採菊秋水憶觀魚一去蓬蒿徑羨君閑
有餘

送王司馬赴潤州

暫屈文爲吏聊將祿代耕金陵且不遠山水復多
名楚塞因高出寒潮入夜生離心逐春草直到建
康城

石城館酬王將軍

誰能繡衣客肯駐木蘭舟連鴈沙邊至孤城江上
秋歸帆背南浦楚塞入西樓何處看離思滄波日
夜流

冬夕寄青龍寺源公

歛屨入寒竹安禪過漏聲高松殘子落深井凍痕
生罷磬風枝動懸燈雪屋明何當招我宿乘月上
方行

聞蟬寄友人

昨日始聞鶯今朝蟬又鳴朱顏向華髮定是幾年

程故國白雲遠閒居青草生因垂數行淚書寄十
年兄

郎士元集卷上

郎士元集卷下

五言律詩

登丹陽北樓

寒皋那可望旅望又初還
迢迢高樓上蕭條曠野
間暮晴依遠水秋興屬連山
浮客時相見霜凋動翠顏

雙林寺謁傅大士

草露經前代津梁及後人
此方今示滅何國更分身
月色空知夜松陰不記春
猶憐下生日應在一微塵

春宴張舍人宅

懶尋芳草徑來接待臣筵山色知殘雨墻陰覺暮
天鶯啼漢宮柳花隔杜陵煙地與東城接春光醉
目前

贈萬生下第還吳

直道多不偶美才應息機霸陵春欲暮雲海獨言
歸爲客成白首入門嗟布衣尊羹若可憶慙出掩
柴扉

送大德講時河東徐明府招

遠近作人天王城指日邊宰君迎說法童子伴隨

緣到處花爲雨行時杖出泉今宵松月下開閣想
安禪

赴無錫別靈一上人

高僧本姓竹開士舊名林一入春山裏千峰不可
尋新年芳草徧度日白雲深欲問微官去懸知訝
此心

送韋逸人歸鍾山

逸人歸路遠弟子出山迎服藥顏猶駐耽書癖已
成柴扉多歲月藜杖見公卿更作儒林傳應須載
姓名

登無錫北樓

秋興因危堞歸心過遠山風霜征鴈早江海旅人
還驛樹寒仍密漁舟晚更閒仲宣何所賦秭欲滯
柴關

和王相公題中書叢竹寄上元相公

多時仙擁裏色並翠琅玕幽意含煙月清陰庇蕙
蘭枝繁宜露重葉老愛天寒竟日雙鸞止孤吟爲
一看

酬蕭二十七侍御初秋言懷

楚客秋多興江林月漸生細枝涼葉動極浦早鴻

聲勝賞睽前夕新詩報遠情曲高慙和者惆悵閉
寒城

賦得長洲苑送李惠

草深那可訪地阻相傳散漫三秋雨踈蕪萬里
煙都迷採蘭處強記館娃年客有遊吳者臨風思
眇然

別房士清

世路還相見偏堪淚滿衣那能郢門別獨向鄴城
歸平楚看蓬轉連山望鳥飛蒼蒼歲陰暮况復惜
馳暉

送彭偃房由赴朝因寄錢大郎中李十七
舍人

衰病已經年西峰望楚天風光欺鬢髮秋色換山
川寂寞浮雲外支離漢水邊平生故人遠君去話
潜然

送李遂之越

未習風波事初爲東越遊露霑湖草晚月照海山
秋梅市門何處蘭亭水向流西興待潮信落日滿
孤舟

送鄭正則徐州行營

從君非隴頭師在古徐州氣勁三河卒功全萬戶
侯元戎閩外略才子握中籌莫聽關山曲還生塞
上愁

送錢拾遺歸兼寄劉校書

墟落歲陰暮桑榆煙景昏蟬聽靜空館雨色隔秋
原歸客不可望悠然林外村終當報芸閣携手醉
柴門

七言律詩

送崔侍御往容州宣慰

秦源獨立望湘川擊隼南飛向楚天奉詔不言空

尉俗清時應得訪遺賢荆門曉色兼梅雨桂水春
風過客船疇昔常聞陸賈說故人今日豈徒然

贈韋司直

聞君感歎二毛初舊友相依萬里餘烽火有時驚
暫定甲兵無處可安居客來吳地星霜久家在平
陵音信踈昨日風光還入戶登山臨水意何如

酬王季友題半日村別業兼呈李明府

村映寒原日已斜煙生密竹早歸鴉長溪南路當
群岫半景東鄰照數家門通小徑連芳草馬飲春
泉踏淺沙欲待主人林上月還思潘令縣中花

春宴王補闕城東別業

柳陌乍隨洲勢轉桃源忽傍竹陰開能將瀑水清
人境直取流鶯送酒杯山下古松當綺席簷前片
雨滴春苔地主同聲復同舍留歡不畏夕陽催

題精舍寺

石林精舍虎溪中夜扣禪扉謁遠公月在上方諸
品靜心持半法萬緣空蒼苔古道行應徧落木寒
泉聽不窮惟有雙峰最高頂此心期與故人同

盍少府新除江南尉問風俗

聞君作尉向江潭吳越風煙到自諳客路尋常隨

竹影人家大底傍山嵐綠溪花木偏宜遠避地衣
冠盡向南惟有夜猿啼海樹思鄉望國意難堪

送粲上人兼寄梁鎮員外

季月還鄉獨未能林行溪宿厭層冰尺素欲傳三
署客雪山愁送五天僧連空朔氣橫秦苑滿目寒
雲隔灞陵借問從來香積寺何時攜手更同登

咸陽西樓別竇審

西樓迥起寒原上霽日遙分萬井間小苑城隅連
渭水離宮曙色近京關亭皋寂寞傷孤客雲雪蕭
條滿衆山時命如今猶未偶辭君擬欲拂衣還

奉和杜相公益昌路作

春半梁山正落花台衡受律向天涯南去猿聲傍
雙節西來江色遶千家風吹畫角孤城曉林映蛾
眉片月斜已見廟謀能喻蜀新文更喜報京華

送郴縣裴明府之任兼充宣慰

白蘋楚水三湘遠芳草秦城二月初連鴈北飛看
欲盡孤舟南去意何如渡江野老思求瘼侯館郴
人憶下車別後天涯何所寄故交惟有袖中書

送李敖湖南書記

憐君本與阮家同掌記能資亞相雄入楚豈忘看

淚竹泊舟應自愛江楓誠知客夢煙波裏肯厭猿
鳴夜雨中莫信衡湘書不到年年秋鴈過巴東

六言絕句

寄李袁州桑落酒

色比瓊漿猶嫩香同甘露仍春十千提携一斗遠
送瀟湘故人

七言絕句

贈強山人

或掉輕舟或杖藜尋常適意釣前溪草堂竹徑在
何處落日孤煙寒渚西

栢林寺南望

溪上遙聞精舍鍾泊舟微徑度深松青山霽後雲
猶在畫出東南四五峰

聽鄰家吹笙

鳳吹聲如隔綵霞不知墻外是誰家重門深鎖無
尋處疑有碧桃千樹花

題尹真人

宵宵雲旗去不還陰陰祠宇閉空山我來始悟丹
青妙稽首如逢冰雪顏

送翹司直

曙雪蒼蒼兼曙雲朔風燕鴈不堪聞貧交此別無
他贈唯有青山遠送君

送別

穆陵關上秋雲起安陸城邊遠行子薄暮寒蟬三
兩聲迴頭故鄉千萬里

郎士元集卷下終

包何集

五言律詩

送泉州李使君

傍海皆荒服分符重漢臣雲山百越路市井十洲
人執玉來朝遠還珠入貢頻連年不見雪到處即
行春

和孟處州間居即事

古郡鄰江嶺公庭半薜蘿府寮閒不入山鳥靜偏
過睥睨臨花柳欄杆枕芰荷麥秋今欲至君聽兩
岐歌

同李郎中淨律院梔子樹

木椀稀難識沙門種則生葉殊經寫字子爲佛稱
名瀘水澆新長燃燈暖更榮亭亭無別意只是勸
修行

同舍弟班韋二員外對秋苔成詠

每看莓苔色如向簿書閒幽思纏芳樹高情寄遠
山雨痕連地綠日映出林斑却要興公賦臨危滑
石間

送王汶宰江陰

郡北乘流去花間竟日行海魚朝滿市江鳥夜喧

城止酒非關病援琴不在聲應緣五斗米數日滯
淵明

送苗員外寓直中書

朝列稱多士君家有二難真爲臺裏栢芳作省中
蘭夜宿分曹間晨趨接武歡每憐雙闕下鴈序入
鴛鸞

江上田家

近海川原薄人家本自稀黍苗期臘酒霜葉是寒
衣市井雖相識漁樵夜始歸不須騎馬問恐畏狎
鷗飛

送韋侍御奉使江嶺諸道催青苗錢

近遠從王事南行處處經手持霜簡白心在夏苗
青迴鴈書應報愁猿客屢聽因君使絕域方物盡
來庭

裴端公使院賦得隔花簾見春雨

細雨未成霖垂簾但覺陰唯看上砌濕不遣入簾
深度隙霑霜簡因風潤綺琴須移戶外屨簷溜夜
相侵

婺州留別鄧使君

西掖馳名久東陽出守時江山婺女分風月隱侯

詩別恨雙溪急留歡五馬遲迴舟映沙嶼未遠剩
相思

賦得秤送孟孺卿

願以金秤鎚因君贈別離鈞懸新月吐衡直衆星
隨掌握須平執銖鎰必盡知由來披分審莫放弄
權移

七言律詩

同閻伯均宿道士觀有述

南國佳人去不迴洛陽才子更須媒綺琴白雪無
心弄羅幌清風到曉開冉冉修篁依戶牖迢迢列

宿映樓臺縱令奔月成仙去但作行雲入夢來

闕下芙蓉

一人理國致昇平萬里呈祥助聖明天下河從闕
下過江南花向殿前生慶雲垂蔭開難落湛露為
珠滿不傾更對樂懸張篴簾歌工欲奏採蓮聲

和程員外春日東郊即事

郎官休浣憐遲日野老歡娛為有年幾處折花驚
蝶夢數家留葉待蠶眠藤垂宛地縈珠履泉迸侵
堦浸綠錢直待閉關朝謁去鶯聲不敢柳含煙

相里使君第七男三日

娶妻生子復生男獨有君家眾所譚荀氏八龍唯
欠一桓山四鳳已過三他時幹蠱聲名著春日懸
弧宴樂酣誰道眾賢能繼體須知箇箇出于藍

長安曉望寄崔補闕

迢遞山河擁帝京參差宮殿接雲平風吹曉漏經
長樂柳帶晴煙出禁城天淨笙歌臨路發日高車
馬隔塵行自憐久住諸生列未得金閨籍姓名

五言絕句

同諸公尋李方直不遇

聞說到揚州吹簫憶舊遊人來多不見莫是上迷

樓

七言絕句

送烏程王明府貶巴江

一片孤帆無四隣
北風吹過五湖濱
相看盡是江南客
獨有君爲嶺外人

寄楊侍御

一官何幸得同時
十載無媒獨見遺
今日不論腰下組
請君看取鬢邊絲

包何集卷終

包佶集

五言律詩

對酒贈故人

扶起離披菊
霜輕喜重開
醉中驚老去
笑裏覺愁來
月送人無盡
風吹浪不回
感時將有寄
詩思澁難裁

同李吏部伏日口號呈元度子路中丞

火炎逢六月
金伏過三庚
幾度衣裳汗
誰家枕簟清
頒冰無下位
裁扇有高名
吏部還開甕
勤勤二客情

餉兵部李侍郎晚過東廳之作

酒禮慙先祭刑書已曠官詔馳黃紙速身在絳紗
安聖位登堂靜生徒跪席寒庭槐暫搖落入爲幸
春看

昭德皇后挽歌詞

西汜馳暉過東園別路長歲華唯隴陌春事罷公
桑龜兆開泉戶禽 閉畫梁更聞哀禮過明 制
心喪

秋日過徐氏園林

回塘分越水古樹積吳煙掃竹催鋪席垂蘿待繫

船鳥窺新罅栗龜上半欹蓮屐入忘歸地長嗟俗
事牽

雙山逢信公所居

遙禮前朝塔微聞後夜鍾人間第四祖雲裏一雙
峰積雨封苔徑多年亞石松傳心不傳法誰可繼
高蹤

奉和柳相公中書言懷

運籌時所貴前席禮偏深羸駕歸貧宅欹冠出禁
林鳳巢方得地牛喘最關心雅望期三入東山未
可尋

寄自江南話過亡友朱司議故宅

交臂多相共風流憶此人海翻移里巷書蠹積埃
塵奉佛棲禪久辭官上疏頻故來分半宅惟是舊
交親

發襄陽後却寄公安人

揮淚送迴人將書報所親晚年多疾病中路有風
塵王粲頻徵楚君恩許入秦還同星火去馬上別
江春

立春後休沐

心與青春背新年亦掩扉漸窮無相學惟避不材

譏積病攻難愈啣恩報轉微定知書課日優詔許
辭歸

五言排律

嶺下臥疾寄劉長卿員外

唯有貧兼病能令親愛踈歲時供放逐身世付空
虛脛弱秋添絮頭風曉廢梳波瀾喧衆口藜藿靜
吾廬喪馬思開卦占鴉嬾發書十年江海隔離恨
子知予

尚書宗兄使過詩以奉獻

洛下交親滿歸閒意有餘翻嫌舊坐宅却駕所懸

車腹飽山僧供頭輕侍婢梳上官唯揖讓半祿代
耕鋤雨散三秋別風傳一字書勝遊如可繼還欲
並園廬

抱疾謝李吏部贈訶梨勒葉

一葉生西徼齋來上海查歲時經水府根本別天
涯方士真難見商胡輒自誇此香同異域看色勝
仙家茗飲暫調氣悟丸喜伐邪幸蒙祛老疾深願
駐韶華

酬于侍郎湖南見寄十四韻

桂嶺千崖斷湘流一派通長沙今賈傳東海舊于

公章甫經殊俗離騷繼雅風金閨文作字玉匣氣
成虹翰墨時無侶丹青夙在公主恩留左掖人望
積南宮巧拙循名異浮沉顧位同九遷歸上略三
已契愚衷責謝庭中吏悲寬塞上翁楚材欣有適
燕石愧無工山曉重嵐外林春苦霧中雪花翻海
鶴波影倒江楓去札頻逢信回帆早掛空避賢方
有日非取愛微躬

近獲風痺之疾題寄所懷

病夫將已矣無可荅君恩衾枕同羈客圖書委外
孫久來從吏道常欲奉空門疾走機先息歆行力

漸煩無醫能却老有變是遊魂鳥宿還依伴蓬飄
莫問根寓形齊指馬觀境制心猿唯借南榮地清
晨暫負喧

奉和常閣老晚秋集賢院即事寄贈徐薛
二侍郎

秘殿掖垣西書樓苑樹齊秋煙凝縹帙曉色上璇
題門接承明近池連太掖低踈鍾文馬駐繁葉綵
禽棲職美綸將綽榮深組及珪九霄偏眷顧三事
早提携對案臨青玉窺書捧紫泥始歡新遇重還
惜舊遊睽左宦登吳岫分家渡越溪賦中頻歎鵬

卜處幾聽鷄望闕應多戀臨津不用迷栢梁思和
曲朝夕候金闈

元日觀百僚朝會

萬國賀唐堯清晨會百僚花冠蕭相府繡服霍嫖
姚壽色疑丹檻歡聲徹九霄御鑪分獸炭仙管弄
雲韶日照金觴動風吹玉珮搖都城獻賦者不得
共趨朝

六言詩

顧著作宅賦詩

幾年江海煙霞乘醉一到京華已覺不嫌羊酪誰

能長守免置脫巾倫招相國逢竹便認吾家各在
芸臺閣裏煩君日日登車

七言律詩

答竇拾遺臥病見寄

今春扶病移滄海幾度承恩對白花送客屢聞簾
外鵲銷愁已辨酒中虵瓶開枸杞懸泉水鼎鍊芙
蓉伏火砂誤入塵埃牽吏役羞將簿領到君家

宿廬山贈白鶴觀劉尊師

蒼蒼五老霧中壇杳杳三山洞裏官手護崑崙象
牙簡心推霹靂棗枝盤春飛雪粉如毫潤曉漱瓊

膏水齒寒漸恨流年筋力少惟思露冕事星冠

送日本國聘賀使晁巨卿東歸五言

上才生下國東海是西鄰九譯蕃君使千年聖主
臣野情偏得禮木性本含真錦帆乘風轉金裝照
地新孤城開蜃閣曉日上朱輪早識來朝歲塗山
玉帛均

七言絕句

戲題諸判官廳壁

六十老翁無所取二三君子不相遺願留今日交
歡意直到隳官謝病時

朝拜元陵

宮前石馬對中峰
雲裏金鋪閉幾重
不見露盤迎曉日
唯聞木斧扣寒松

觀壁畫九想圖

一世榮枯無異同
百年哀樂又歸空
夜闌烏鵲相爭處
林下真僧在定中

酬顧况見寄

干越城邊楓葉高
楚人書裏寄離騷
寒江瀉瀉思儔侶
歲歲臨流刷羽毛

歲日作

更勞今日春風至
枯樹無枝可寄花
覽鏡唯看飄亂髮
臨風誰爲駐浮槎

祀風師樂章

迎神

太臯御氣句芒肇
功蒼龍青旗爰候
祥風律以和應神
以感通鼎俎修饗
時惟禮崇

奠幣登歌

旨酒告潔青蘋應
侯禮陳瑤幣樂獻
金奏彈弦自昔解
凍惟舊仰瞻時
蠻群祥來湊

迎俎酌獻

德盛昭臨迎拜異方爰候發生式薦馨香酌醴具
舉工歌再揚神歆入律恩降百祥

亞歲終獻

管籥備玉帛陳風動物樂感神三獻終百神臻草
木榮天下春

送神

微穆敷華能應節飄揚發彩宜行慶送迎靈駕神
心饗跪拜靈壇禮容盛氣和草木發萌芽德暢禽
魚遂翔泳永望翠蓋逐流雲自茲率土調春令

祀雨師樂章

迎神

陟降左右誠達幽圓作解之功樂惟有年雲輶戾
止灑霧飄煙惟馨展禮爰列豆籩

奠幣登歌

歲正朱明禮布元制惟樂能感與神合契陰霧離
披靈馭搖裔膏澤之慶期於稔歲

迎俎酌獻

陽開幽蟄躬奉鬱鬯禮備節應震來靈降動植求
聲飛沈允望時康氣茂惟神之貺

亞獻終獻

包信集
奠既備獻將終神行令瑞飛空迎乾德祈歲功乘
煙燎儼從風

送神

整駕昇車望寥廓垂陰薦祉蕩昏氛饗時靈貺優
如在樂罷餘聲遙可聞飲福陳誠禮容備撤俎終
獻曙光分跪拜臨壇結空想年年應節侯油雲

包信集卷終



程